

sen. Vber diß/ hat er neben der Lateinischen Poësi, zu der Frantzösischen auch grosse [Jij v] beliebung getragen/ vnd in selbiger Sprache statliche Poëmata hinterlassen. Die Deutsche Poesin anlangend/ ist er der erste Erfinder gewesen/ welcher derselben in seiner Muttersprach die rechte art gegeben/ die Bahn zu erst gebrochen/ vnd den vornembsten Stein zu solcher Zierligkeit vnd auffnehmen geleet/ darinnen sie jetzo von vielen vornehmen Edlen vnd Vnedlen usirt vnd gebraucht wird. Dannenhero er von vielen der Deutsche Virgilius vnd Ovidius ist genennet worden. Er selbst hat sich vber die masse damit ergetzet/ vnd vnterschiedliche Bücher der Alexandrinischen Versche/ mit jhren rechten cæsuren, endungen vnd andern zugehörigen elegantien, von Geist- vnd Weltlichen sachen/ so viel er sich seiner vielfaltigen vnd gehäufften wichtigen Geschäfte abmüssigen können/ verfertigt/ deren theils auff inständiges begehren hoher Personen vnd fürnehmer Liebhaber solcher Kunst/ er durch den Druck ans Liecht kommen lassen/ theils aber noch vngedruckt/ vnd ordentlich zusammen geschrieben verhanden seyn.²²

Die Genealogiæ der mehrentheils Könige in gantz Europa, wie auch der Chur- vnd Fürstlichen Häuser/ daß ich der Gräfflichen geschweige/ sind jhme so läufftig gewesen/ daß er sie nach einander expedite vnd ohne anstoß erzehlen können/ welches ich offtermahl mit verwunderung angehoret/ vnd gedacht/ es were nicht möglich/ dieselbige so viel Jahr zu behalten/ vnd mit fertiger geschwindigkeit her zusagen: Zu deme hat er auch in Franckreich grossen fleiß auff alle Adelige Exercitia vnd Rittermässige übungen gewandt/ vnd es so hoch darinne gebracht/ daß er deßwegen bey hohen vnd niedern Standes Personen hoch angesehen/ gehalten vnd herfür gezogen worden/ vnd insonderheit so [Jij r] wol wegen seiner geschickligkeit/ als aller anderer Adelichen Tugenden vnd Exercitien, von den Hochgelahrten/ weitberühmten vnd Wohlgebornen Herrn/ Herrn Mornæo Plessæo²³, vnd Herren Achatio vnd Christophoro beyden Freyherren vnd Burggraffen von Donaw²⁴/ in der Königlichen Residentzstadt Paris/ sehr lieb vnd werth gehalten/ also daß sie seiner Conversation sich lange nützlich gebrauchet/ vnd jhn vngern von sich gelassen.

Als er nunmehr gantzer drey Jahr mit obigen herrlichen vnd rühmlichen übungen in Franckreich sich in ansehen gebracht/ vnd dergestalt qualificirt, daß er Fürsten vnd Herren zu Hoff vnd in der Regierung/ mit Rath vnd That nützliche/ angenehme vnd nothwendige Dienste erzeigen können/ hat er sich wider in Deutschland begeben/ seine vornehme Gaben/ vnd von Gott verliehenes talent nicht zu vergraben/ sondern zu Gottes Lob vnd Preiß/ dem Gemeinen Nutzen zum besten/ seiner familie zum Ruhm vnd Ehr/ vnd jhm selbst zu zeitlicher vnd ewiger Wolfahrt anzulegen/ Vnd ist darauff/ weil er insonderheit wegen seines Vatern Sel Todt Zeitung bekommen/ im Jahr Christi 1608. von Fürst Johann Georgen zu Anhalt⁴ F. Gn. hochseligen Andenckens/ deroselben Eltern Herrn Sohn Fürst Joachim Ernst²⁵ hochlöblicher Gedächtnis/ auff recommendation der hochermeldten Herren Achatii vnd Christophori beyder Burggraffen von Donaw nach verspürten vornehmen vielfältigen qualiteten vnd Gaben mit wolbedachtem Rath vorgesetzt vnd zugeordnet/ Darauff er auch im selben Jahr mit hochgedachten Fürsten Joachim Ernst von hier nacher Amberg/ vnd